

Aber des Krauts halber so Vitruuius an diesem ort Luteam nennet / ist auch ein zweiffel / dann dieweil der Kreuter viel seind dieser zeit / so gelb / vnd auch schön grün ferben / vermeinen etlich das an diesem ort Vitruuius nicht von dem Weydkraut geschrieben hab. Die Selinussisch Kreiden hat den nammen von dem ort do sie wechset vnd gefunden wirt / dauon Plinius vnd Dioscorides weitlauftiger schreiben. Aber die Anularis sol ein weyße farb sein / damit die gemalte Bildnuß der Weyber angestrichen worden seind / ist von Kreiden vnd Glas gemacht worden.

Dauon magstu Plinium weiter lesen am 6 Cap. des 35 Buchs.

Ende des Siebenden Buchs  
Vitruuij.

## Vorrede Vitruuij an den Groß- mechtigsten Keyser Augustum / in das viiij. Buch der Architectur.



**V**er namhafftig Philosophus Thales von Mileto / so vnder die Sieben Weisen der Griechen auch gezelet wordē / wil das aller ding anfang vn̄ vrsprung auß dem Element des Wassers sey. Aber Heraclitus setzet das Element des Fews. So wöllen die Weisen Magi das solche beide Element mit einander de vrsprung aller ding geben sollen. Euripedes aber Anaxagore Discipel / hette viel ein andre meinung / dann er hielte das der Luft vnd Erdtrich durch den Regen ein fruchtbarkeit empfangen / darauf die Menschen vnd alle Lebliche Creaturen iren vrsprung nehmen / vnd hernach durch die zeit wider zerstöret / eben wider in solche beide Element gebracht wurden / aber was vom Luft sein vrsprung hette / das dasselbig sich wider in Lüfftigkeit begeben / vnd sein vorige eygenschaft vn̄ proprietet widerumb annehmen vnd also vn̄zertgenglich were. Diesen Philosophum haben die Athenienser Scenicum genant. Aber Pythagoras / Empedocles / Epicharmus / vnd andere mehr fleissige Erkundiger der Natur vnd Philosophi / haben vier anfang vnd vrsprung aller ding gesetzt / als Luft / Fewr / Wasser vnd Erdtrich / welche durch die vermischung einander verhasst nach eins jeden eygenschaft sonderliche qualitates verursachte. Dann wir sehen klärlich vor augen / das nicht allein alle wachsende ding von diesen vier Elementen iren vrsprung haben / sunder das auch die selbigen jr in keinem V iij weg